



ME MŌHIO KI Ō MŌHIOHIO WHAIARO

Me mōhio ki ō tika tūmataiti



Privacy Commissioner
Te Mana Matapono Matatapu

He aha te ‘mōhiohio whaiaro’?

Ko ngā mōhiohio whaiaro koinā ngā mōhio mōu anō. He tino nui tēnei ki te whakaarohia e koe.

Ko tō ingoa te tauira māmā, engari he tīmatanga noa iho tērā. Ko ētahi atu tauira o te mōhiohio whaiaro ko tō wāhi noho, he pikitia o tō kanohi, he tuhinga rānei o ō whakaaro, tirohanga hoki. Ko tētahi mea mōu he mōhiohio whaiaro tērā.

Te tiaki i ō mōhiohio whaiaro

I raro i te ture, me manaaki ngā pakihi, whakahaere hoki i ō mōhiohio whaiaro.

He pēhea te āwhina a te Ture Matatapu i a koe

Ko te kaupapa o te Ture Matatapu mōu anō me ngā mōhiohio e puritia ana mōu.

He mātāpono ā te Ture Matatapu mō te pupuri mōhiohio whaiaro. E here ana i ngā pakihi, whakahaere hoki ki te whai i ngā mātāpono whāiti ina kohi, whakamahi, putu hoki i ō mōhiohio whaiaro.

Ngā mea taketake

Ina kohia e tētahi pakihi, whakahaere rānei ngā mōhiohio mōu, me whai whakaaetanga rātau i a koe mō tēnei. Me mārama anō ki tā rātau e kohi ana, ā, me te kaupapa e whakamahia ana.

Kaua rawa e tuaritia e rātau ō mōhiohio mēnā kāore koe i te mōhio, i te whakaae rānei. Mēnā he mōhiohio ā ētahi whakahaere mōu, me tuku rātau i a koe ki te kite ina tonu koe.

Me mātua whakarite anō ngā pakihi, whakahaere hoki kei te tika o mōhiohio, ā, kei te puritia ngitatia. Ina mutu ana te hiahia i o mōhiohio, me āta whakakore atu.

He pēhea te āhua o te takahi tūmataitinga

Anei ētahi āhuatanga e takahia ai pea tō tūmataitinga:

- Ka tukuna o mōhiohio ki tētahi kāore i whakamanahia e koe (hei tauira, i tukuna tō reta ki te whare kē)
- Kei te hē ngā mōhiohio e puritia ana mōu (hei tauira, he nama kāore nāu)
- Kāore koe i whakaae kia kohia he mōhiohio mōu (hei tauira, he kāmera ataata i tētahi wāhi tūmataiti)
- Ka tono koe mō o mōhiohio engari kāore e tukuna e te pakihi ki a koe.

Ka aha au mēnā ka takahia taku tūmataitinga?

- 1 Me whakamōhio atu ki te tari whai mana i aha. Ka taea pea e rātau te whakarite wawe i te raruraru mōu.
- 2 Whakapā mai ki tō mātau rōpū uiui: haere ki tā mātau paetukutuku ka whakakī i te puka uiui tuihono. Ka kōrero ki a koe mō ngā mahi ake pea hei whai.
- 3 Te tuku amuamu mai ki tō mātau tari. Ka taea te tuku amuamu tuihono ki tā mātau paetukutuku: www.privacy.org.nz.

Te tuku amuamu me te whakarite whakaaetanga

Ina tuku amuamu tūmataiti koe, ka whakarite ngā kaitirotiro a Te Mana Mātāpono Matatapu mēnā he whaitake tō amuamu, ā, ka āwhina i a koe kia eke he whakataunga me te tari mōna nei tō amuamu.

Ehara i te mea me whai pūtea ngā whakataunga. Kua kite mātau i ngā whakaritenga rerekē i roto i ngā tau – hei tauira, he putiputi, ngā kete taonga, ā, i tētahi āhuatanga he hararei ki tāwāhi mā te kaiauamu me tōna hoa.

Ko te take kia whakaritea te amuamu mō ngā taha e rua – te kaiauamu me te tangata e whakapaetia ana.

Mātai take: He mōhiohio hauora

I taki ā-waha tētahi rata i ngā kōrero mō tētahi tūroro taumaha. I tuhia mai e tētahi kaimahi ngā kōrero, ka mōhio ia ki te ingoa o te tūroro ka kī ia ki tētahi o ō rāua hoa i te māuiui te tūroro. I waea atu te hoa ki te tuku kupu aroha ki a ia. I tino pōuri te tūroro i te mea kāore anō ia kia kōrero ki ōna hoa mō tōna mate. I tana tuku amuamu, ka whakapāha mai te hohipera me te tuku pūtea kapeneheihana mō te wharanga ā-whatumanawa i puta nā te takahi i te tūmataitinga.

Mātai take: I whai tētahi kaitango nama i tangata kē

I whakahau tētahi umanga tango nama i tētahi tangata kia utua tana nama rīhi i kī ia kāore nāna. I tana ngana ki te whakatika i te hē, i tono mōhiohio ia mai i te umanga mō te nama e whakapaetia ana engari i whakahētia tana tono.

I tuku amuamu mai te tangata ki tō mātau tari, ā, ka tiro tirohia e mātau. I āwhina mātau i a ia ki te whakaū i tōna tuakiri me te umanga. I tā mātau whakaūtanga ki te umanga ehara nā te tangata te nama, i whakapāha te umanga ki a ia me te whakaū atu kua mutu te whaiwhai i a ia.

Te Kōmihana Matatapu

Ka whakarite te Kaikōmihana Matatapu kia whai te tangata i te Ture Matatapu me te tiro tiro i ngā takahitanga o te Ture.

Ka whakarite anō te Kōmihana Matatapu he mōhio te tangata ki ana tika, here hoki i raro i te Ture mā te hāpai i te tūmataiti ki te iwi whānui.

Me te aha, kaore te Kōmihana i te mahi takitahi. He kaimahi ā te Kōmihana i ngā wāhanga pēnei i ngā whakatewhatewha, kaupapa here, ture, whitiwhiti kōrero hoki.

Ko te hunga me whai i te Ture Matatapu?

Tata ki te katoa o ngā whakahaere, pakihi hoki me whai i te Ture Matatapu. Arā, ko ngā tari kāwanatanga, karapu, kura, hāhi, toa hokohoko me te maha atu.

I te nuinga o te wā, kāore e whai pānga te Ture Matatapu ki ngā mahi a te tangata kotahi. He rerekē mēnā he tino kino ngā mōhiohio whaiaro.

NGĀ RAUEMI

Mō ētahi atu kōrero, te tuku amuamu tuihono rānei, tirohia tā mātau paetukutuku: www.privacy.org.nz.

Mō ngā kōrero mō tētahi take tūmataiti:

- Tirohia te 'AskUs', ā mātau meka tuihono - privacy.org.nz/Ask
- Tukuna mai he pātai mā te puka uiui tuihono: <https://privacy.org.nz/enquiries>
- Ako anō mō te tūmataiti mā ā mātau akoranga tuihono: www.privacy.org.nz/e-learning

PUKAMATA



<https://www.facebook.com/PrivacyNZ>

TĪHAU



@NZPrivacy

RANGIATA



Privacy NZ

KAPOATA



[nzprivacy](https://www.instagram.com/nzprivacy)



Privacy Commissioner
Te Mana Matapono Matatapu